

摘藻堂四庫全書薈要

集部

欽定四庫全書薈要

集部
山谷外集卷一

詳校官助教臣謝登雋



欽定四庫全書薈要卷一萬五千一百七十二

集部

山谷外集卷一

宋 黃庭堅 撰

賦二首

劉明仲墨竹賦

放目亭賦

古詩七十五首

溪上吟 并序

清江引

還家呈伯氏

流民歎

次韻答張沙河

次韻時進叔二十六韻



二月丁卯喜雨為北門留守文潞公作

古風次韻贈答初和甫二首

次韻答和甫盧泉水三首并序

招子高二十二韻兼簡常輔世弼

林為之送筆戲贈再和答為之

再和答為之贈趙言

次韻晁補之廖正一贈答詩

再次韻呈廖明略

走答明略適堯民來相約奉謁故篇末及之

答明略并寄无咎

再次韻呈明略并寄无咎

再答明略二首

次韻感春五首

聖東將寓于衛再次韻感春五首贈之

謝張泰伯惠黃雀鮓

次韻謝子高讀淵明傳

奉答子高見贈十韻

次韻孔著作早行

次韻晁无咎閭子常携琴入村

贈答晁次膺

春遊

同堯民遊靈源廟用馬陵二字賦詩二首
奉和王世弼寄上七兄先生用其韻

贈張仲謀

送薛樂道知鄆鄉

送張沙河遊齊魯諸邦

送吳彥歸番陽

薛樂道自南陽來入都作詩餞行

次韻奉送公定

種決明

都下喜見八叔父

次韻答叔原

同王稚川飯寂照房

次韻叔原

次韻稚川

竹軒詠雪

丙寅十四首效韋蘇州

并序

對酒歌答謝公靜

戲贈李彥深

寄南陽謝外舅

次韻正仲三丈

賦二首

劉明仲墨竹賦

子劉子山川之英骨毛粹清用意風塵之表如秋高月
明游戲翰墨龍蛇起陸嘗其餘巧顧作二竹其一枝葉
條達惠風舉之瘦地筍筍夏篁解衣三河少年稟生勦
剛春服楚楚俠游專場王謝子弟生長見聞文獻不足
猶起人羣其一折幹偃蹇斫頭不屈枝老葉硬強項風
雪廉蔭之骨成塵凜凜猶有生氣雖汲黯之不學挫淮
南之鋒於千里之外子劉子陵雲自許按劔者多故以

歸我請觀謂何黃庭堅曰吾子於此可謂能矣猶有修
篁之歲晚枯枿之發春少者骨梗老而日新附之以傾
崖礧石摧之以冰霜斧斤第其曾高昭穆至於來昆仍
雲組練十幅烟寒雨昏迺為能盡之蓋陽虎有若之似
夫子市人識之顏回之具體門人不知蘇子曰世之工
人或能曲盡其形至於其理非高人逸才不能辨意其
在斯故籍外論之梓人不以慶賞成虞病僂不以萬物
易蝸及其至也禹之喻於水仲尼之妙於韶蓋因物而

不用吾私焉若夫燕荆南之無俗氣庖丁之解牛進技
以道者也文湖州之得成竹於胸中王會稽之用筆如
印印泥者也詩云鶴鳴于九臯聲聞于天妙萬物以成
象必其胸中洞然好學者天不能掣其肘劉子勉旃

放目亭賦

走馬承受丁君作亭於其廨東北吾友宋楙宗以為盡
表裏江山之勝名其亭曰放目而黔江居士為之賦
放心者遂指而喪背放口者招尤而速累自作訛訛自

增憤憤登高臨遠惟放目可以無悔防心以守國之械
防口以挈瓶之智以此放目焉方丈尋常而見萬里之
外

古詩七十五首

溪上吟

并序
年十六
時

春山鳥啼新雨天霽汀草怒長竹篠交陰黃子觀漁
於塘下尋春於小桃源從以溪童稚子畦丁三四輩
茶鼎酒瓢淵明詩編雖不命戒未嘗不取諸左右臨

滄波拂白石詠淵明詩數篇清風為我吹衣好鳥為
我勸飲當其溲然無所拘係而依依規矩準繩之間
自有佳處乃知白蓮社中人不達淵明詩意者多矣
過酒肆則飲亦無量也然未始甚醉蓋其所寓與畢
卓劉伶輩同而自謂所得與二子異人亦殊不能知
之也酒酣得紙書之為溪上吟

短生無長期聊暇日婆娑出門望高丘拱木漫春蘿試
為省鬼錄不飲死者多安能如南山千歲保不磨在世

崇名節飄如赴燭蛾及汝知悔時萬事蓬一窠青青陵
陂麥妍暖亦已花長烟淡平川輕風不為波無人按律
呂好鳥自和歌杖藜山中歸牛羊在坡陀本自無廊廟政
爾樂澗阿念昔揚子雲刻意師孟軻狂夫移九鼎深巷考
四科亦有好事人時能載酒過無疑舉爾酒定知我
為何

清江引

時年
十七

江鷗搖蕩荻花秋八十漁翁百不憂清曉采蓮來盪漿

夕陽收網更橫舟
羣兒學漁亦不惡
老妻白頭從此樂
全家醉着蓬底眠
舟在寒沙夜潮落

還家呈伯氏

葉縣作

去日櫻桃初破花
歸來着子如紅豆
四時驅迫少須臾
兩鬢飄零成老醜
永懷生在江南日
原上急難風雨後
私田苦薄王稅多
諸弟號寒諸妹瘦
扶將白髮渡江來
吾二人如左右手
苟從祿仕我遭回
且慰家貧兄孝友
強趨手板汝陽城
更責愆期被訶詬
法官毒螫草自搖

丞相霜威人避走賤貧孤遠蓋如此此事端於我何有
一囊粟麥七十錢五人兄弟二十口官如元亮且折腰
心似次山羞曲肘北窻書冊久不開筐篋黃塵生鏤鈕
何當略得共討論况迺雍容把杯酒意氣敷腴貴壯年
不蚤計之且衰朽安得短船萬里隨江風養魚去作陶
朱公斑衣奉親伯與儂四方上下相依從用舍由人不
由已迺是伏轅駒犢耳

流民歎

朔方頻年無好雨五種不入虛春秋邇來后土中夜震
有似巨鼇復戴三山遊傾墻摧棟壓老弱冤聲未定隨
洪流地文劃剝水感沸十戶八九生魚頭稍聞澶淵渡
河日數萬河北不知虛幾州累累極負衰葉間問舍無
所耕無牛初來猶自得曠土嗟爾後至將何怙刺史守
令真分憂明詔哀痛如父母廟堂已用伊呂徒何時眼
前見安堵踈遠之謀未易陳市上三言或成虎禍災流
行固無時堯湯水旱人不知桓侯之疾初無證扁鵲入

秦始治病投膠盈掬俟河清一簞豈能續民命雖然猶
願及此春略講周公十二政風生郡口方出奇老生常
談幸聽之

次韻答張沙河

張侯堂堂身八尺老大無機如漢陰猛摩虎牙取吞噬
自歎日月不照臨策名日已汙軒冕逃去未必焚山林
我評君才甚高妙孤竹截管空桑琴四十未曾成老翁
紫髯垂頤鬱森森眉宇之間見風雅藍田烟霧生球琳

胷中磊磊政須酒東海可攬北斗斟古人已悲銅雀上
不聞向時清吹音百年毀譽付誰定取醉自可結舌瘖
使公繫腰印如斗駟馬高蓋驅駸駸親朋改觀婢僕敬
成都男子寧異今又言屋底甚縣磬兒婚女嫁取千金
古來聖賢多不飽誰能獨無父母心衆鷓墮地各有命
強為百草憂春霖艾封人子暗目睫與王同床悔沾襟
隴鳥入籠左右啄終日思歸碧山岑一生能幾開口笑
何忍更遣百慮侵忽投雄篇寫逸興仰占乾文動奎參

自陳使酒嘗罵坐惜予不與朋盍簪君材蜀錦三千丈
要在刀尺成衣衾南朝例有風流癖楚地俗多詞賦淫
屈原離騷豈不好只今漂骨滄江潯政令夷甫開三窟
獵以我道皆成禽溫恭忠厚神所勞於魚得計豈厭深
丈夫身在要勉力豈有吾子終陸沉鄙人相士蓋多矣
勿作蔡澤笑噤吟

次韻時進叔二十六韻

時子河上園竹間開棟宇大兒勝衣冠小兒豐頰輔嫁

女與朱公伏臘可稱舉髮踈雖蒼浪齒嚼未齟齬雞棲
牛羊下各自有室處四墻規模小易守若滕莒舍前花
木深春物麗觀觀舍後曲池蛙齋堂風月苦此豈不足
歎歎歲不我與客宦孤雲耳未知秦吳楚向來千駟公
果愧一丘土寧當損軒昂聊欲效俯偃時子忻然笑吾
已寤倉鼠少猶守章句晚實愛農圃鵲巢最知風蟻穴
識陰雨世網事諳委醉鄉俗淳古坐忘兩家說肉堅與
腸腐酒至即使傾客來敢辭宴時邀五柳陶共過三徑

詞往在少年場豪氣壓潁汝借令今尚爾真復難共語
稍知憐翅藥漸解等灘澆朋友半山阿光陰共行旅人
故義當親衣故義當補飛鳧王令尹期我向君所君為
拂眠床淹留莫城阻

水自河出為灘
自濟出為澆

二月丁卯喜雨吳體為北門留守文潞公作

乘輿齋祭甘泉宮遣使駿奔河岳中誰與至尊分盱食
北門卧鎮司徒公微風不動天如醉潤物無聲春有功
三十餘年霖雨手淹留河外作時豐

是時太母閔雨勤
甚故有微風不動

之句

古風次韻答初和甫二首

饑思河鯉與河魴渴思蔗漿玉益涼冬願純綿對陰雪
夏願縹緜度盛陽萬端作計身愁苦一事不諧鬢蒼浪
調笑天街吟海燕藜羹脫粟非公狂

君吟春風花草香我愛春夜璧月涼美人美人隔湘水
其雨其雨怨朝陽蘭荃盈懷報瓊玖冠纓自潔非滄浪
道人四十心如水平那得夢為蝴蝶狂

次韻答和甫盧泉水三首并序

和甫作盧泉之水不求於古樂府而規模暗合予為
和成三疊自予官河外罕得逆耳之言於朋友和甫
愛我也居有藥言吾不欲其思盧泉也故作其一父
母之邦有如仲尼柳下惠而懷安之以吾之樂雙井
知和甫之不忘盧泉也故作其二坐進此道者於物
無擇清漳之波濁河之流盧泉之水求其異味而不
得也親樂之身安之斯可矣故作其三夫三言者雖

不同唯知言者領其不異也

初侯不能六尺長少日結交皆老蒼勢利不可更炎涼
解纓從我濯滄浪與君論心松栢香何為獨憶盧泉之
上多綠楊盧泉如練照秋陽泉上之人猶謗傷此邦雖
陋有佳士勿厭風沙吹茫茫願君不負上池水囊中探
丸起人死

盧泉之木百尺長下蔭泉色如木蒼蘋風荷雨洒而涼
倒影搖蕩天滄浪網登錦鱗蒲荇香何以貫之柳與楊

古來希價入咸陽，貪功害能相中傷。君今已出紛爭外，
但思烟波春淼茫。奉親安樂一杯水，盧泉之濱可忘死。
舍後鍾梵爐烟長，舍前簾影竹蒼蒼。事親煖席扇枕涼，
中有一士鬢蒼浪。同心之言蘭麝香，與游者誰似姓楊。
朝發枉渚夕辰陽，懷瑾握瑜祇自傷。東有濁河西清漳，
胡為搔頭盧泉思。茫茫清明在躬不在水，此曹狡獪可
心死。

招子高二十二韻兼簡常甫世弼

我行向厭次夏扇日在搖甘瓜未除壘高柳尚鳴蜩駕
言聊攝歸飛霜曉封條負薪泣裘褐公子御狐貂歲月
坐晚晚鬢顏颯然凋道德千古事斯文非一朝往者我
不及後生多見起吾黨二三子士林聳孤標小謝抱周
易忘言獨參寥崔郎楚左史二典考舜堯王生風雅學
談辯秋江潮洒筆驚有司小敵謂可驕安知擣蒲局臨
關敗三梟三生數步隔屢赴茗椀邀小謝殊未來我覺
百里遙問之憂菽水心慮極無聊父憐母不訶日以濁

酒澆此道如鼎實念子羹未調古來有親養回也樂一
瓢不田鷄生實在物乃為祇吾言有師承可信如丰杓
詩以解子憂亦用當子招

林為之送筆戲贈

閻生作三副規摹宣城葛外貌雖銑澤毫心或麗糯巧
將希粟尾拙乃成棗核李慶縛散卓含墨能不洩病在
惜白毫往往半巧拙小字亦周旋大字難曲折時時一
毛亂迺似逆梳髮張鼎徒有表徐偃元無骨模畫記姓

名亦可應倉卒為之街南居時通鈴下謁晴軒坐風涼
怪我把枯筆開囊撲蠹魚遣奴送一束洗硯磨松煤揮
灑至日沒蚤年學屠龍適用固踈闊廣文困糞鹽烹茶
對秋月略無人問字况有客投轄文章寄呻吟講授費
頰舌閒無用心處雌黃到筆墨時不與人遊孔子尚愛
日作詩當鳴鼓聊自攻短闕

再和答為之

君勿嘲廣文
沍寒被締葛
君勿嘲廣文
窮年飯糗常

恐俎豆予與世充肴核凡木不願材大折小枝洩櫟依
曲轅社聊用神其拙吾家本江南一丘藏曲折瀕溪蔭
蒼葭蕭洒可散髮既無使鬼錢又無封侯骨薄祿庇閑
曹且免受逼卒為此懶出門徒敝懷中謁直齋賓客退
風物供落筆詩成著牀頭不知今幾水君何向予勤見
詩歎埋沒嗣宗須酒澆未信習懷闊自狀一片心碧潭
浸寒月令德感來教為君賦車轄君思揚雄吒何似張
儀舌此意恐大狂願為引繩墨政使此道非改過從今日

報章望瓊琚勿使音塵闕

再和答為之

林君維閩英數面成瓜葛鄰居接杖藜過飯厭踈櫛讀
書飽工夫論事極精核奮身君子場勇若怒未洩窮年
棲旅巢由命非由拙王良驅八駿方駕度九折學堂踈
雨餘石砌長苔髮弟子肥如豚先生瘦唯骨

林君在朱氏講授未

氏兒皆面白豐肥而林君如刻削

北門一都會塵埃人辛卒高蓋如秋

荷勢利相奔謁唯君尚寂寞來觀草玄筆斯文未易陳

政當高閣束金馬事陸沉市門逐乾沒未須相賢愚聊
自嘲迂闊憶昨戲贈詩迺辱報明月極知推挽意我車
君欲轄屠龍真狂言奔馬不及舌賜書盈五車直舍方
二墨會意便欣然餘事過窓日尚恐素餐錢諸生在城
闕

贈趙言

饒陽趙方士眼如九秋鷹學書不成不學劍心術妙解
通神明鑿如俯身拾地芥相如仰面觀天星自言方術

雜鬼怪萬種一貫皆天成大梁卜肆傾賓客二十餘年
聲籍籍得錢滿屋不經營散與世人還寄食北門塵土
滿衣襟廣文直舍官槐陰白雲勸酒終日醉紅燭圍碁
清夜深大車駟馬不回首強項老翁來見尋向人忠信
去表襮可喜政在無機心輕談禍福邀重糈所在多於
竹葦林翁言此輩無足聽見葉知根論才性飛騰九天
沉九泉自種自收皆在行先期出語駭傳聞事至十九
中時病輪困離奇惜老大成器本可千萬來自嘆輕霜

白髮新又去驚動都城人都城達官老於事嫌翁出言
不斌媚有手莫炙權門火有口莫辯荆山玉吳宮火起
燕焚巢當時卞和斲兩足千里辭家却入門三春榮水
會歸根我有江南黃篾舫與翁長入白鷗羣

次韻晁補之廖正一贈答詩

晁子抱材耕谷口世有高賢踐台斗項隨計吏西入關
闕夫數日傳車還封侯半屬妄校尉射虎猛將猶行間
無因自致青雲上浪說諸公見嗟賞驥伏鹽車不稱情

輕裘肥馬鳳凰城歸來作詩謝同列句與桃李爭春榮
十年山林廖居士今隨詔書稱舉子文章宏麗學西京
新有詩聲似侯喜君不見古來良為知音難絕絃不為
時人彈已喜瓊枝在我側更恨桂樹無由攀千里風期
初不隔獨憐形迹滯河山

再次韻呈廖明略

吾觀三江五湖口湯湯誰能議升斗物誠有之士則然
晚得廖子喜往還學如雲夢吞八九文如壯士開黃間

十年呻吟江湖上青楓白鷗付心賞未減北郭漢先生

五府交書不到城

漢汝南
廖扶

相者舉肥驥空老山中無人

桂自榮君既不能如鍾世美匭函上書動天子且向華
陰郡下作參軍要令公怒令公喜君不見晁家樂府可
管絃惜無傾城為一彈從軍補掾百僚底九闕虎豹何
少攀男兒身健事未定且莫著書藏名山

走答明略適堯民來相約奉謁故篇末及之

君不見生不願為牛後寧為雞口吾聞向來得道人終

古不忒如維斗希價咸陽諸少年可推令往挽令還俗
學風波能自拔我識廖侯眉宇間省庭無人與爭長主
司得之如受賞東家一笑市盡傾略無下蔡與陽城生
珠之水砂礫潤生玉之山草木榮觀君詞章亦如此諒
知躬行有君子更約探囊閱舊文蛛絲燈花助我喜賢
樂堂前竹影班好鳥自語莫令彈比隣著作相勞苦整
駕謁子邀同攀應煩下榻煮茶藥坐待月輪銜屋山

答明略并寄无咎

可以忘憂唯有酒清聖濁賢皆可口前日過君飲不多
明日解醒無五斗古木清陰丹井欄夜來涼月屋頭還
論交撥置形骸外得意相忘樽俎間冰壺不可與夏蟲
饗秋月不可與俗士賞已得樽前兩友生更思一士濟
陽城雖無四至九卿之規畫猶有千秋萬歲之真榮空
名未食太倉米今作斑衣老萊子卿家嗣宗望爾來不
獨我聞足音喜西風索寞葉初乾長鋏歸來亦罷彈窮
巷蓬蒿深一尺朱門廉陛高難攀吾儕相逢置是事百

世之下仰高山

再次韻呈明略并寄无咎

夏雲涼生土囊口周鼎湯盤見科斗清風古氣滿眼前
乃是戶曹報章還只今書生無此語已在貞元元和間
一夫鄂鄂獨無望千夫唯唯皆論賞野人泣血漫相明
和氏之璧無連城參軍拄笏看雲氣此中安知枯與榮
我夢浮天波萬里扁舟去作鷓夷子兩士風流對酒樽
四無人聲鳥聲喜夢回擾擾仍世間心如傷弓怯虛彈

不堪市井逐乾沒且願朋舊相追攀寄聲小掾篤行李
落日東面空雲山

再答明略二首

挾策讀書計餬口故人南箕與北斗江南江北萬重山
千里寄書聲不還當時朱絃寫心曲果在高山流水間
枯桐滿腹生蛛網忍向時人覓清賞廖侯文字得我驚
五岳縱橫守巖城萬夫之下不稱屈定知名滿四海非
真榮富如春秋已如此它日卜隣長兒子一丘各自有

林泉扶將白頭親宴喜秋風日暮衣裳單深巷葉落已
如彈數來會面復能幾六龍去人不可攀短歌溷公更
一和聊乞淮南作小山

廖侯言如不出口銓量古今膽如斗度越崔張與二班
古風蕭蕭筆追還前日辭家來射策聲名籍甚諸公間
華陰白雲鏢千嶂勝日一談誰能賞君不見曩時子產
識然明知音鬱鬱閉佳城勿以匣中之明月計較糞土
之朝榮我去丘園十年矣種桑可蠶犢生子使年七十

今中半安能朝四暮三浪憂喜據席談經只強顏不安
時論取譏彈愛君草木同臭味頗似瓜葛相依攀我有
仙方煮白石何時期君藍田山

次韻感春五首

我與子亲友既往雨彌旬交情未曾改天地忽趨新東
風無形迹佳氣滿城門麥苗生陂隴歎息不食陳誰能
裹飯來定是寂寞人一曲古流水試拂絃上塵古木少
生意輪囷卧河濱慙愧桃與李相隨見陽春

張侯脫朝衣兒褐多純綠聞道無米煮木學辟穀官
吏但索錢詔書哀婢獨東方長九尺不得侏儒祿屋中
聲鵝鴈日暮攪心曲窮巷無桃李緼袍非春服我吟白
駒詩知君在空谷

祁寒不可怨天道自平分及爾春風來四肢有餘溫丈
夫力如虎為人行灌園椒蘭土擁蔽未可怨芳蓀寒魚
守窮轍蒙煦一沫恩一朝被前拂吹毛見癩痕

鳥聲春清長煙雨春薄暮風光不長妍如客暫時寓芸

芸物爭時天地有常度我行覩大河黃流日東驚喟然
欲乘桴莽不見洲渚張侯但飲酒無用恨羈旅十年富
貴子今作一丘土

富貴子一
作尊前客

茶如鷹爪拳湯作蟹眼煎時邀草玄客晴明坐南軒笑
談非世故獨立萬物先春風引車馬隱隱何闐闐高蓋
相摩戛騎奴爭道喧吾人撫榮觀宴處自超然城中百
年木有鵲巢其顛鳴鳩來相宅日莫更謀遷

聖東將寓於衛行乞食於齊有可憐之色再次韻

感春五首贈之

溫氣水底歸忽忽六過旬園林改柯葉鳥聲日日新耕
稼百年外四郊無短門高丘試顧望俯仰迹已陳信陵
松鬱鬱不見曩時人空懷負暄賞莫望屬車塵腹中書
萬卷陪死溝壑濱投壺與射覆一笑物皆春

種萱欲遣憂叢薄空自綠洗心日三省人亦不我穀誰
能書窻下草玄抱幽獨白首官不遷校書漢天祿身當
萬戶侯鼓吹擁部曲解佩著犀渠張弓挿彫服何時李

將軍射獵出上谷

春風鳴布穀天道似勸分持飢望路人誰能顏色溫
笑憶枯魚說談諧老漆園湘纍不得祿哀怨寫荃蓀千
年澗谷松慚愧雨露恩思為萬乘器願掩斧鑿痕

風雨桃李華佳人来何暮安齊果未安寓衛豈所寓張
侯室縣罄得酒美無度常憂腐腸死須我嫁阿鶩雙魚
傳尺書何處迷春渚啼鳥勸不歸曉鞍逐行旅遙知登
樓興信美非吾土

魯公但食粥百口常憂煎金張席貴寵奴隸乘朱軒丈
夫例寒飢萬世無後先風霾天作惡雷亦怒聞聞俄頃
花柳靜烟暖谷鳥喧人事每如此翻覆不常然下流多
謗議高位又疾顛空餘壯士志不逐四時遷

謝張泰伯惠黃雀鮓

去家十二年黃雀慳下筋笑開張侯盤湯餅始有助蜀
王煎鮓法醯以羊羶兔

俗謂亥卯未
鼠純

麥餅薄於紙含漿和

醎酢秋霜落場穀一一挾翼絮殘飛蒿艾間入網輒萬

數烹煎宜老稚
罌缶煩愛護
南包解京師
至尊所珍御
玉盤登百十
睥睨輕桂蠹
五侯噉豢豹
見謂美無度
瀕河飯食漿
瓜蒞已佳茹
誰言風沙中
鄉味入供具
坐令親饌甘
更使客得與
蒲陰雖窮僻
勉作三年住
願公且安樂
分寄尚能屢

次韻謝子高讀淵明傳

枯木嵌空微暗淡
古器雖在無古弦
袖中政有南風手
誰為聽之誰為傳
風流豈落正始後
甲子不數義熙前

一軒黃菊平生事無酒令人意缺然

奉答子高見贈十韻

柳徑雨著綿竹齋風隕籜屏處人事少晴餘鳥聲樂詩
卷墮我前謂從天上落君有古人風詩如古人作單瓢
謝膏梁翰墨化糟粕誤蒙東海觀吾淺乃可酌真成聞
道百自謂莫已若謝生石蘊王志尚本丘壑雖無首陽
粟飲水亦不惡楚然何時來為我一發藥

次韻孔著作早行

棄置鉏犁就車馬從來計出古人下塵埃好在三尺桐
不疑萬世期子野明經使者著書郎風雨乘驛忘夙夜
回車過門問無恙何意深巷勤長者聖師之後蓋多賢
領略世故有餘暇白面長身雖不見好古發憤尚類也
自然身如警露鶴每先鳴雞整初駕北行河決所至郡
肅肅王命哀鰥寡力排滹沱避城郭深澤疲民且田舍
賈生三策藏胸中羿矢百中不虛捨行歸定拜闕內侯
但賜黃金恐非價

次韻无咎閻子常携琴入村

士寒餓古猶今向來亦有子桑琴倚檻嘯歌非寓淫伯
牙山高水深深萬世丘壘一知音閻君七絃抱幽獨晁
子為之梁父吟天寒絡緯悲向壁秋高風露聲入林冷
絲枯木拂蛛網十指乃能寫人心村村擊鼓如鳴鼉豆
田見角穀成螺歲豐寒士亦把酒滿眼飮餽梨棗多晁
家公子屢經過笑談與世殊白科文章落落映晁董詩
句徃徃妙陰何閻夫子勿謂知人難使琴抑怨久不和

明光晝開九門肅不令高才牛下歌

贈答晁次膺

次膺豪健如霜鷗空拳誤掛田犬牙果輸司空城旦作
付與步兵厨人家野馬橫郊作凝水牽牛引竹上寒花
無酒醉公不甚惜誦公五字使人嗟

春游

終日桃李蹊春風不相識同我二三子承我作意力把
酒忘味著者花了香寂晴雲散長空曠蕩無限隔身為

金五口人卷一
蝴蝶夢本自不漁色春蟲勸人歸今我誠是客歸來翻
故紙書尾見麟獲文字非我名聊取二三策

同堯民游靈源廟廖獻臣置酒用馬陵二字賦詩
靈源廟前木我昔見拱把七年身屢到鬱鬱蔭簷瓦春
風響馬銜並轡客瀟洒更願少尹賢置酒意傾寫齋堂
有佳處花柳輕姪姹蓮塘想舊葉稻畦識枯苴開闢
撫洪河黃流極天瀉憶昔武皇來繫壁沉白馬從官親
土石襁負至鰥寡空餘瓠子詩哀怨逼騷雅白圭自聖

禹今誰定真假晁子發謹言聖功諒難亞排河著地中
勢必千里下移民就寬閒何地不耕稼此論似太高吾
亦茫取舍有器可深川吾未之學也

馬字

洪河壯觀游太府佳友朋春色挽我出東風如引繩昏
昏版築氣王事始繁興大堤如連山小堤如岡陵增卑
更培薄萬杵何登登憶昨河失道平原魚可罾田萊人
未復瘡大國方懲忽念耒耜開為民保丘塍百縣伐磬
出夜半廢曲肱吾儕愧祿廩游行事鞍乘晁子漢公孫

新去司馬丞出幹大農部才術見嗟稱我坐廣文舍七
年讀書燈結髮入場屋肯謂河難憑爾來觸事短癡甚
霜前蠅世味極淡薄不了人愛憎惟得一卮酒尚能別
淄澠所以對樽俎未曾問斗升酌我良已多狂言恐侵
陵暮雲吞落日歸鳥求其朋

復用前韻

冷官僕馬瘦及門鼓

騰騰

陵字

奉和王世弼寄上七兄先生用其韻

宮槐弄黃黃蓮葉綠婉婉時同二三友竹軒涼夏晚駕

言都城南以望征車返何知苦淹回及此秋景短愁思
令人瘦舉目道路遠西風脫一葉薦士聞鄉選簡書催
渡河賓客不得展親憂對萱叢婦病廢中盥言趨厭次
城鞭馬倦長阪棗林蔽天日交陰不容織仰者實離離
憶見花纂纂異鄉懷節物不共斟酒盞舉場下馬入深
鑠嚴籥管諸生所程書裙束若稽稭蜜燈坐回環丹硯
精料東披榛拔芝蘭斷石收琰琬紛爭一日事聲實溷
端窾天球或弃遺斗筭尚何算西歸到官舍塵土昏案

板寒窻穿碧流潤礎鬧蒼蘚詩書鵲巢翻帷慢蛛絲胃
果知兄未來光陰坐晚晚昨蒙叔父報亦歎音書簡薄
言使事重激切被天遣逋流一方病責任媿和扁咨詢
懷靡及不遑暇息偃嚼冰進糜飧衝雪踏層巘嚴霜八
月飛貂狐無餘煖念嗟叔母劉窮年寄甥館尚憐公初
點誘掖到昭宥庭堅薄才資行又出畦町浮雲與世踈
短綆及道淺匠伯首斲回大樗終偃蹇學宮尸廩入奉
養闕豐腆學徒日新聞孤陋猶舊典小材渠困我持斲

問輪扁

復用此一韻
事異似不害

大材我屈渠越雞當鵠卵未能引

分去戀祿幸苟免平生報一飽從事極黽勉豈如不見

收放身就閒散思伯卧江南無心趣軒冕龐翁跡頗親

黃蘗門屢款齋餘佛飯香茶沸甘露滿逢人問進退餘

事寄一筦仲父挾高材甘為溝中斷

音短

青黃可犧樽薦

廟配瑚璉季父有逸興未嘗入都輦臨流呼釣船拂石

弄琴阮雍容從朋交林下追游衍田園雖足樂及時思

還返陰寒不鳴條望損倚門眼南枝喜鵲鳴尺素託黃

犬又以窀穸留歸期指姑洗寄聲問僧護兒髮可以縮

妙言對賓客稱渠萬金產爾來弄筆硯墨水惡翻建

蹇音

大字如栖鴉已不作肥軟魯論未徹章政苦諸叔懶新

詩開累紙欲罷不能卷遠懷託孤高別思盈繾繾秋月

明夜潮柘漿凍金椀踈杵韻寒砧幽泉流翠窠吟哦口

垂涎嚼味有餘雋傳示同好人我家東牀坦風烟意氣

生揮毫寫藤蠶獵山窮鷄駕罩海極蝦蜆銀鈎亂眼膜

嘉句濯肺腕且言伯在野朋友必推挽五泰列清廟聖

緒今皇續真儒運斗樞道化迪天顯朝論惜才難逸民
大蒐獮豸聞任方物包貢遺羽斡招車必翹翹前席思
蹇蹇王甥欲好懷高意恐難轉長篇題遠筒封寄淚空
潛遙知雲際開灰飛黃鍾管

贈張仲謀

車如雞栖馬如狗閉門常多出門少去天尺五張公子
官居城南地館好健兒快馬紫游韁迎我不知沙路長
江榆老柳媚寒日枯荷小鴨凍野航津人刺船起應客

遙知故人一水隔下馬索酒呼三遲騎奴笑言客竟癡
向來情義比瓜葛萬事略不置叮咛追數存亡異憂樂
燭如白虹貫酒卮開軒臨水弄長笛吹落殘月風淒淒
城頭漏下四十刻破魔驚睡聽新詩君詩清壯悲節物
政與秋蟲同一律爾來更覺苦語工思婦霜碁擣寒月
朱顏綠髮深誤人不似草木長青春潔身好賢君自有
今日相者進於舊以茲敢傾一盃酒為太夫人千歲壽

送薛樂道知鄆鄉

黃山葉縣連牆居謝公席上對樗蒲雙鬟女弟如桃李
早許歸我舍中鷄平生同憂共安樂歲晚相望青雲衢
去年樽酒輦轂下各喜身為反哺鳥城頭歸鳥尾畢逋
春寒啄雪送行車解珮我無明月珠折柳下對千里駒
念君胸中極了了作吏辦事猶詩書濁酒挽人作年少
關防心地亦時須鄖鄉縣古民少訟但問自己不闕渠
登臨一笑雙白髮宣城凍筍供行厨人生此樂他事無
行李道出漢南都寄聲諸謝今何如謝公書堂迷竹塢

手種竹今青青
否我思謝公
淚成雨屬公
去灑襟下土
送張沙河遊齊魯諸邦

張侯去沙河
三食鄴下麥
筆力望晁董
頗遭俗眼白
平生學經綸
胸中負竒畫
未論功活人
飽飯不常得
妻寒尚賓敬
兒餓猶筆墨
側聞共伯城
魚稻頗宜客
又待塵生甑
欲往立四壁
平生貸米家
十輩來薄責
囊無孔方
凡面有在陳
色守株伺投
兔歲晚將何
獲廣道無人行
春風轉沙石
栖栖馬如狗
去謁東侯伯
布衣未可量
蒼

髯身八尺魚乾要斗水士困易為德譬之舉大木人借
一臂力諸公感意氣豈待故相識吾窮乏祖餞折柳當
馬策

送吳彥歸番陽

學省困壘鹽人材任尊獎倥侗祝螟蛉小大器麗旒諸
生厭晚成躡學要僧馭摹書說偏旁破義析名象九鼎
奏簫韶爰居端不饗青衿少到門庭除晝閒敞竹風交
槐陰三見秋氣爽時賴解事人載酒直心賞吳郎楚國

材幽蘭秀椿莢彥國吐嘉言子將喜標榜平生欽豪俊
久客慕鄉黨虛齋延灑掃飯薦脍鯪詩句唾成珠笑
嘲愜爬痒春夏頻謝除曾未厭來往歸鴈多喜聲寒蟬
停哀響黃花滿籬落白蟻鬧甕盎留君待佳節忽忽戒
徂兩親戚傷離居交游念疇曩碁局無對曹檮蒲失朋
長問君去為何雲物愁莽蒼壽親髮班班千里勞夢想
家雞葉頭肥寒魚受罾網甘旨藪中厨伊啞弄文襁此
行樂未央安知川塗廣深秋上滄江遠水平如掌人生

要得意壯士多曠蕩野鶴疲籠樊江鷗戀菰蔣本來丘
壑姿不著芻豢養寄聲謝鄉隣為我具兩槩有路即歸
田君其信非誑

薛樂道自南陽來入都留宿飲會作詩餞行

薛侯本貴胄射策一矢中金蘭託平生瓜葛比諸從數
面尚成親况乃居連棟交游及父子講學連伯仲奴人
通使令孩稚接戲弄相憐負米勤同力采蘭供每持君
家書平安覩款縫秦人與吾爰憂樂一體共釋之廷尉

曹微過成繫訟從此張長公不肯為時用丘阿無梧桐

曲直不在鳳生涯谷口耕世事邯鄲夢自君抱憂端酒

椀未忍喫用借高秋自南歸意氣稍寬縱黃花尚滿籬白

蟻方浮窺私言助燕喜且莫戒輜重霜風獵帷幕銀燭

吐蟬竦密坐幸頗歡劇飲寧辭痛疎鐘鳴曉撞小雨作

寒霧旆馬蕭蕭鳴征人稍稍動九衢槐柳中縱緩青絲

鞵朱樓豪士集紅袖清歌送河鯉獻鱸材江橙解包貢

蟹擘鵝子黃酒傾琥珀凍舉觴遙酌我發噓知見頌行

行鞭箠倦短句煩屢諷

次韻奉送公定

去年君渡河棗下實離離今年君渡河棗詠幽詩直
緣恩義重不憚鞍馬疲詩書半行李道路費歲時親交
歎存沒學問訪闕遺我多後時悔君亦見事遲即此有
真意定非兒女知虛名無用處北斗與南箕燕趙游俠
子長安輕薄兒狂掉三寸舌躡登九級墀覆手雲雨翻
立談光陰移歛血盟父子指天出肝脾從來國器重見

謂骨相奇築巖發夢寐獵渭非熊螭百工改繩墨一世

擅文詞全人脰肩肩甕盎媼且宜大槐陰黃庭女蘿綿

絡之韶陽兩兄弟還自如蛾眉工顰又宜笑百輩來茹

咨班姬輕鴻毛更合衆口吹引繩痛排根音病蒙蔽枉成

帷唯恐出已上殺之如奕碁塵埃百年琴絕絃為鍾期

落落虎豹文義難管中窺至今揚子雲不與俗諧嬉歲

晚草玄經覃思寫天維脫身天祿閣危於劍頭炊卧聞

策董賢閉門甘忍飢五侯盛賓客騶轡交橫馳時通問

字人得酒未曾辭近者君家翁天與脫馬鞵已為冥冥
鴻矰繳尚安施養蘭尋僧圃愛竹到水湄北闕免朝請
西都分保釐文章九鼎重富貴一黍累趙良請灌園但
為商君嗤弃甲尚文過兕多牛有皮出任書掣肘歸來
菊荒籬不為五斗折自無三徑資勝箭洗蹠血歸鞍懸
月支斯人萬戶侯造物付鑪錘我觀史臣篇疏略記糟
醜譬如官池蛙誰能問公私君懷明月珠簸弄滄海涯
深房佩芳蘭固是玉所姬南貢尚包橘漢濱莫大隨每

來促談塵風生塵竹枝翫麟得家法伊優不能為但聽
呼檣蒲便足解人頤功成在漏刻穎利處囊錐失勢落
坑穽寒窻如愁鷓得馬折足禍亡羊多歧悲屢敵因心
計伏兵幾面欺長戈仰闕來吐款受羈縻萬事只如此
畢竟誰成虧愛君方寸間醇朴乃器師安得擺俗纏東
崗並鉏犁由來在陰鶴不必振羽儀送行傾車蓋載酒
滿鷓夷天高木葉落潦退河流卑屯雲塞大幕新月吐
半規人生會面難取醉聽狂癡語竅發期笑

一作詩鋒

犯嘲譏懸知履霜來少別為不怡天津媚河漢闕角掛
秋霓中有鬼與神赤舌弄陰機夜光但什襲出懷即瑕
疵去去善逆旅凍醪約重持山藥倒藤架紅梨帶寒曦
坐須騎奴還淹留歲恐期無為出門念牽衣嬰孺啼短
韻願成頌時時寄相思

種決明

后皇富嘉種決明注方術耘鋤一席地時至觀茂密縹
葉資萋萋緗花馬蹄實霜叢風雨餘簸簸場功畢枕囊

代曲肱甘寢聽芬苾老眼願力餘讀書真成癖

都下喜見八叔父

一別七冬夏幾書通置郵冥鴻難借問江鯉多沉浮心
因夢想去迹為山川留叔趨丹鳳闕身向卧龍洲邂逅
入關馬同時解轡鞅別後事萬端向來身百憂咨嗟舊
田園慟哭新松楸稍詢耆舊間大半歸山丘小兒携婦
子襁褓皆裹頭清燈照逆旅呼酒濯亂愁破啼為笑語
霜夜盡更籌歲寒叔舊節况又高春秋老松心梗概綠

竹氣和柔言如不出口體若不勝裘德音潤九里政事
無金牛詩成戲筆墨清甚常蘇州篆籀有志氣當於古
人求自悲聞道晚涉世如虛舟雖無觸物意儻亦遭罵
咻稍窺性命學未窮言行尤息心待自信渺如大河流
隄防小不密一決敗數州安得心服禮不見為瘡疣荆
雞變化材鵠卵滯陰幽願因啄抱力浩蕩碧雲游

次韻答叔原會寂照房呈稚川

客愁非一種歷亂如蜜蜂房食甘念慈母衣綻懷孟光我

家猶北門王子渺湖湘寄書無鴈來哀草漫寒塘故人
哀王孫交味耐久長置酒相暖熱愜於冬飲湯吾儕癡
絕處不減顧長康得閒枯木坐冷日下牛羊坐有穠田
衲頗薰知見香勝談初疊疊修綆汲銀床聲名九鼎重
冠蓋萬夫望老禪不掛眼看蝸書屋梁韻與境俱勝意
將言兩忘出門事袞袞斗柄莫昂昂月色麗雙闕雲雪
浮建章苦寒無處避唯欲酒中藏

同王稚川晏叔原飯寂照房得房字

高人住寶坊重客欵齋房市聲猶在耳虛靜生白光幽
子遺淡墨窻間見瀟湘蕙葭落鳧鴈秋色媚橫塘博山
沉水烟淡與人意長自携鷹爪牙來試魚眼湯寒浴得
溫溥體淨心凱康盤飡取近市厭飫謝羶羊裂餅羞豚
膾包魚芰荷香平生所懷人忽言共榻牀常恐風雨散
千里鬱相望斯游豈易得淵對妙濠梁稚人王稚川易
親復難忘晏子與人交風義盛激昂兩公盛才力宮錦
麗文章鄙夫得秀句成誦更懷藏

次韻叔原會寂照房得照字

風雨思齊詩草木怨楚調本無心擊排勝日用歌嘯僧
牕茶烟底清絕對二妙俱含萬里情雪梅開嶺徼我慙
風味淺砌莎幕松蔦中朝盛人物誰與開顏笑二公老
諧事似解寂寞釣對之空歎嗟樓閣重晚照

次韻稚川得寂字

平生萬里興斂退著寸尺向來類竊鉄少日已爭席曩
過招提飯愜當易為適食鮭如舉士名下無遺索談餘

天雨花荼罷風生腋誰言塵土中有此座上客言前傾
許可曾次開塢塞同是蠹魚癡還歸理編冊長安千門
雪蟹黃熊有白更約載酒行無為守岑寂

竹軒詠雪呈外舅謝師厚并調李彥深

破臘春未融土膏寒不發數聲鳴條風一夜灑牕雪開
軒萬物曉落勢良未歇鏗鏗青琅玕閱此歲凜冽摧埋
頭搶地意氣終自潔君子謂此君全身斯明哲屋頭維
女貞顏色少澤悅稍能窺藩籬亦有固窮節佳興冉冉

生門外無車轍寫之朱絲絃清坐待明月

丙寅十四首效常蘇州

并序

二月丙寅率李原彥深謝愔公靜游百花洲適為游人所擅
見拒於晨門因賦何人有酒身無事誰家多竹門可欵之句
行繫馬李氏園步至廣濟僧舍謁冠萊公祠用吏部韻

雪霽草木動春融烟景和嘉辰掩闕坐如此節物何同
游得二子晤對不在多

不知鞍馬倦想見洲渚春清晝鏤芳園誰家停畫輪高

柳極有思向風招游人

漸嘉樓外花嘉賞亭邊柳作者歸山丘今春為誰有千

秋萬歲後還復來游否

漸嘉樓陽夏謝希深
作嘉賞亭范文正作

城南有佳園風物迎馬首但賞主人竹不飲主人酒紅
日媚紫苔輕風泛青柳

三公未白髮十輩乘朱輪只取人看好何益百年身但
願長今日清樽對故人

江梅香冷淡開遍未全疎已有耐寒蝶雙飛上花須今

夜巖城角肯留花在無

我思五柳翁解作一生事得錢送酒家便靜尋山寺念
我還如此翁應會人意

庭空日色靜樓迥鐘聲遲褐叟已爭席馴鴉更不疑同
來復同去竟別我為誰

謝甥有逸興李髯非不嘉苦思夢春草醉狂眠酒家斯
游無俗物傲睨至昏鴉

寺古老僧靜亭陰脩竹多萊公作州日部曲屢經過衆

推識公面蒼石眠綠莎

盛時衆吹噓謫去衆毀辱不為公存亡幽蘭春自綠欲
書見相傳安得南山竹

昔公調鼎實指顧九廟尊郡國富士馬于今開塞垣誰
能起公死為國守北門

出身世喪道解綬飢驅我杯中得醉鄉去就不復果豈
謂俗人言達人儻予可

少小尚狷介與常人不款置身稍雍容遇酒輒引滿自

金五口人卷一
是鶴足長難齊見脛短

對酒歌答謝公靜

我為北海飲君作東武吟看君平生用意處蕭洒定自
知人心南陽城邊雪三日愁陰不能分皂白摧輪踈蹄
沉數尺城門晝閉眠賈客移人僵尸在旦夕誰能忍長
待食麥身憂天下自有人寒士何者愁填臆民生政自
不願材可乘以車可鞭策君不見海南水沈紫旃檀碎
身百煉金博山豈如不蒙斧斤賞老大絕崖霜雪間投

身有用禍所集何況四達之衢井先汲昨日青童天上
回手捧玉帝除書來一番通籍清都闕百身書名赤城
臺飛昇度世無虛日怪我短褐趨塵埃顧謂彼童子此
何預人事但對清樽即眼開一杯引人著勝地傳聞官
酒亦自清徑須沽取續吾瓶南山朝來似有意今夜儻
放春月明

戲贈彥深

李原字彥深厚
之弟居南陽

李髯家徒立四壁未嘗一飯能留客春寒茅屋交相風

倚牆捫虱讀書策老妻甘貧能養姑寧剪髮鬢不典書
大兒得殮不索魚小兒得袴不索襦庾郎鮭菜二十七
大常齋日三百餘上丁分膳一飽飯藏神夢訴羊楚蔬
世傳寒士有食籍一生當飯百甕殖冥冥主張審如此
附郭小圃宜勤鋤葱秧青青葵甲綠早韭晚菘羹糝熟
充虛解戰賴湯餅笔以蒔壘與甘菊幾日憐槐已著花
一心况笋莫成竹羣兒笑髯窮百巧我謂勝人飯重肉
羣兒笑髯不若人我獨愛髯無事貧君不見猛虎即人

厭麋鹿人還寢皮食其肉濡需終與豕俱焦飲肥擇甘
果非福蟲蟻無知不足驚橫目之民萬物靈請食熊蹯
楚千乘立死山壁漢公卿李髯作人有佳處李髯作詩
有佳句雖無厚祿故人書門外猶多長者車我讀揚雄
逐貧賦斯人用意未全疎

寄南陽謝外舅

謝公遂偃蹇南陽無舊廬天與解纓紱元非傲當塗庖
丁釋牛刀衆手斫大觚白雲曲肱卧青山滿床書妙質

落川澤果然天網疎然知

一作
故知

今人巧未覺古人迂築

場歲功休夜泉鳴竹渠曾懷鬱磊砢此物諒時須兒能

了翁事安用府中趨孫能誦翁詩乃是千里駒人生行

樂耳用舍要自如我方神其拙社稷官道禱公猶憂斧

斤睥睨斲樽壺萬古身後前芭蕉秋雨餘少年喜狡獪

叱化粒成珠謨功可歌舞學古則暖姝所好果不同未

可一理驅眇忠忘言對安得南飛鳧鄙心生蔓草萌芽

望耘鋤離筵如昨日春柳見霜枯未辱錦繡段時蒙雙

鯉魚憶在參几杖雍容觀規模引接開藻鑒高明通事
樞門生五七輩寂莫半白鬚談經落塵尾行樂從籃輿
省竹辟疆宅閱士黃公壚雪屋煮茶藥晴簷張畫圖幽
寺促燈火青檀置檣蒲遶床叫一擲十白九雉盧蔡澤
來分功袁耽必上都開旗縱七走破竹殄羣胡成巢燭
為明挾長朋佐呼終飲見溫克所爭匪錙銖誰令運甃
翁見謂牧豬奴事託丈人重乃愛屋上烏舊言如對面
形迹滯舟車風簾想隱几天籟鳴寒梧尚喜讀書否還

能把酒無鄴城渺塵沙冠蓋若秋葉相過問寒溫意氣
馳九衢楚客雖工瑟齊人本好竽永懷溟海量北斗不
可斟勝夜親筆墨因來明月珠

次韻正仲三丈自衡山返命舍驛過外舅師厚贈

答

昏昏市井氣咕咕兒女語禽喧聲百種春作事萬緒人
間雞黍期天上德星聚乖離略十年髮白齒齟齬太史
禱衡丘佐王用貌虎子雲免大夫草玄空自苦人生只

爾是付與覓頭醋


山谷外集卷一

謹案外集第十七頁後六行好鳥自語莫令彈刊
本彈訛蟬據別本改

第十九頁後七行君不見曩時子產識然明刊本
明訛門據左傳改

第二十二頁後四行下流多謗議刊本議訛識按
語本漢書司馬遷傳今據改

第四十一頁後五行葱秧青青葵甲綠刊本綠訛
錄據宋詩鈔改



總校官庶吉士 臣張能照

校對官中書 臣王家賓

謄錄監生 臣朱學濂

欽定四庫全書薈要

集部

山谷外集卷二

三

詳校官助教臣謝登雋



欽定四庫全書薈要卷一萬五千一百七十三

集部

山谷外集卷二

宋 黃庭堅 撰

古詩七十八首

次韻謝外舅病不能拜復官

次韻師厚視田悼李彥深

次韻師厚食蟹

次韻謝外舅食驢腸

次韻師厚答馬著作

次韻師厚黃連橋

次韻外舅謝師厚病間十首

和謝公定征南謠

寄耿令幾父過新堂邑作

放言十首

送伯氏入都

次韻孔四著作作北行滹沱

渡河

次韻李六弟濟南郡城橋亭之詩

和甫得竹數本於周翰喜而作詩和之

寄題欽之草堂

和答梅子明

送劉道純

次韻子瞻春菜

六舅以詩來覓銅屏用長句持送

次韻子瞻與舒堯文禱雪霧豬泉唱和

見子瞻粲字韻詩和答三人四返不困而愈崛

奇輒次舊韻寄彭門三首

次韻答堯民

再和寄子瞻聞得湖州

用明發不寐有懷二人為韻寄李秉彛

賦未見君子憂心靡樂八韻寄李師載

以同心之言其臭如蘭為韻寄李子先

次韻晁元忠西歸十首

次韻謝外舅病不能拜復官夏雨眠起之什

丈人養疴卧此道取衆弃強飯尚可飽力田苦常置欲
從羣兒嬉出語不斌媚軒牕坐風涼編簡勘遺墜自安
井無禽未歎旅焚次夏暑極陽功時霖作陰事呼兒疏
藥畦植杖按瓜地南山雲氣佳北極冕旒邃自欣鬢髮

白得見衣裳
治山林收枯槁
草木洗憔悴
舐痔以車來
探珠遭龍睡
腹便時蒙嘲
身退得自恣
伊優無下僚
骯髒謝高位
誰能領斯會
好在漆園吏

次韻師厚五月十六日視田悼李彥深

彥深去年五月十三

日與之
游西郊

南鴈傳尺素
飛來卧隴城
頗知高卧久
忽作田野行
湛陂水滿欣欣
原草榮日華麗
山川秀色奪
目精對酒
不滿懷攬物
有餘清念昔
讀書客遠人
遺世情南畝
道

觀餉西郊留勸耕共遊如昨日笑語絕平生此士今已
矣賓筵老無成猶倚謝安石深心撫發悞

老無成一
作無老成

次韻師厚食蟹

海饌糖蟹肥江醪白蟻醇每恨腹未厭誇談齒生津三
歲在河外霜臍常食新朝泥者郭索暮鼎調酸辛趨蹌
雖入笑風味極可人憶觀淮南夜火攻不及晨橫行葭
葦中不自貴其身誰憐一網盡大去河伯民鼎司費萬
錢玉食羅常珍吾評揚州貢此物真絕倫

次韻謝外舅食驢腸

垂頭畏庖丁趨死尚能鳴說以雕俎樂甘言果非誠生
無千金轡死得五鼎烹禍胎無腸胃殺身和椒橙春風
都門道貫魚百十并騎奴吹一呌駟駿不敢爭物材苟
當用何必渥洼生忽思麒麟種突兀使人驚

次韻師厚答馬著作屢贈詩

嘗聞馬南郡少有拔俗韻寒灰幾見溺鍛翮常思奮桐
薪鳴竈間劍氣吐吳分多言世益嗤當律心自隱家雖

四壁立仕要三無愠會將漁父意往就莊生問

和答師厚黃連橋壞大木亦為秋電所碎之作

溪橋喬木下往歲記經過居人指神社不敢尋斧柯青
陰百尺蔽白日烏鵲取意占作窠黃泉浸根雨長葉造
物著意固已多風摧電一作電打掃地盡竟莫知為何謹
訶獨山冷落城東路不見指名終不磨

次韻外舅謝師厚病間十首

貝錦不足歌請陳江漢詩美人出江漢窈窕世未窺折

蘭不肯珮告我以蠶飢獨歸豈憚遠三危露如飴
德人更疾術智益灑落反身見萬古道不在卜度習
中有鑿鄒老境要志弱謝公賦達生達生真可託

引鏡照清骨驚非曩時人天地入喻指芭蕉自觀身程
力則已病征財又室貧古來支離疏粟帛王所仁

一作
主至

仁

菹寒知園秋飯白問米賤婦孫勸甘旨霜兔頗宜麵黃
花不舉酒佳句餘嫪戀經行宴坐堂鼠迹書几硯

桃李一春期松栢千歲永經玄事寂寞髮白官閒冷草
綠艾如張波清蠶伺影東里與無趾渠有幸不幸

病餘兒廢鋤

一作呼
見鋤

門巷草芊蕪來者何所聞披草足

蹙然封侯謝骨相使鬼無金錢夢作白鷗去江湖水黏
天

民生自煎熬煮豆以冀饜居然忘本根光陰不供翫藏
山夜半失烏合歸星散因病見不生達人果大觀

開田種白玉飽牛事耕犁雨露非無澤得秋常苦遲猛

虎擅文章班班被諸見長松抱勁節唯有歲寒知
謝公蔣蘭莒真意付此物惠然風肯來香為一披拂遙
知醉吟姿黽勉向朱紱搢笏橘袖黃僧屋對像佛
身病心輕安道肥體癯瘦好懷當告誰四墻棗紅皴負
暄不可獻捫虱坐清晝端有真富貴千秋萬年後

和謝公定征南謠

傳聞交州初陸梁東連五溪西氏羌軍行不斷蠻標盾
謀主皆收漢畔亡合浦譙門腥血沸晉興城下白骨荒

謀臣異時坐致寇守臣今日愧包桑已遣戈船下灘水
更分樓船浮豫章頗聞師出三鷓路盡是中屯六郡良
漢南食麥如食玉湖南驅人如驅羊營平請穀三百萬
祁連引兵九千里少府私錢不可知大農計歲今餘幾
土兵蕃馬貔虎同蝮虵毒草篁竹中未論芻粟捐金費
直愁瘴癘連營空我思荊州李太守欲募蠻夷令自攻
至今民歌尹殺我州郡擇人誠見功張喬祝良不難得
誰借前筋開天聰詔書哀痛言語切為民一洗橫尸血

推鋒陷堅賞萬戶塹山堙谷窮三穴南平舊時頗臣順
欲獻封疆請旌節廟謀猶計病中原豈知一朝更屠滅
天道從來不爭勝功臣好為可喜說交州鷄肋安足貪
漢開九郡勞臣監呂嘉不肯佩銀印徵側持戈敵百男
君不見往年瀕海未郡縣趙佗閉關罷朝獻老翁竊帝
聊自娛白頭抱孫思事漢孝文親遣勞苦書稽首請去
黃屋車得一亡十終不忍太宗之仁千古無

寄耿令幾父過新堂邑作廼幾父舊治之地

呼舩凌大河驅馬踏平沙道旁開新邑千戶有生涯四
衢平且直綠槐陰縣衙問誰作此邑耆舊對予嗟前日
耿令君遷民出坳窰始遷民懷土異端極紛拏既遷人
氣和草木茂萌芽桃李雖不言春風滿城花陵陂青青
麥烟雨潤桑麻自非耿令君大澤荒蕪葭白頭晏起飯
襁褓語嘔啞自非耿令君漂轉隨魚蝦豈弟民父母不
專司斂賒令君兩男兒有德必世家問令今安在解官
駕柴車當時舞文吏白璧強生瑕令君袖手去不忍試

虎牙人往惜事廢感深知政嘉我聞耆舊語歎息至昏
雅定知循吏傳來者不能加今為將軍客軒蓋湛光華
幕府省文書醉歸接羅斜懷寶仁者病偷安道之邪勉
哉思愛日贈言同馬馱

放言十首

廢興宜有命得失但自知蹢蹢衆所忌悠悠誰與歸吾
義苟不存豈更月攘雞風清聞鶴唳想見南山棲

匣中綠綺琴欲撫已絕絃問絃何時絕鍾期謝世年正

聲不可聞千載寂寞間未有顏叔子安知柳下賢

輕肥馬上郎枯槁林下士聲名斲自然勢利焚和氣智
人不駭俗同朝皆用事物外有華胥時時夢中至

蘭楫桂為舟大江可遠游堅車無良馬出門敗吾輶一
身交萬物用我未易周安得柳下惠窮年與之遊

微雲起膚寸大蔭彌九州至仁雖愛物用捨如春秋晴
空不成雨遠岫行歸休何疑陶淵明一去如鷺鷥

黃鵠送黃鵠中道言別離送君不憚遠愁見獨歸時羅

網翳稻梁江湖水瀾瀾行行不相見勉哉冥冥飛
蟬聲已紆遲秋日行晚晚長年困道路驅馬方更遠從
事常厭煩歸心自如卷旨甘良未豐安得懷息偃

月滿不踰望日中為之傾天地尚乃爾萬物能久盈明
德忌曄曄高才貴冥冥忽解扁舟去懷哉張季鷹

榨床在東壁病起統壁行新醅浮白蟻渴見解朝醒小
槽垂玉筋音響有餘清疾風春雨作靜夜山泉鳴安得
朱絲絃為我寫此聲想知舜南風正爾可人情

弄水清江曲采薇南山隅當吾無事時此豈不我娛喬
木好鳥音天風韻虛徐遐心遊四海萬里不須臾回首
古衣冠荆樊老丘墟欲付此中意歸翻蟲蠹書短生憂
不足此道樂有餘

送伯氏入都

貧賤難安處別離更增悲經營動北征慈母待春衣短
筮驅瘦馬青草牧口嘶送行不知遠可忍獨歸時太華
物華春街柳嚙黃鸝九衢生紫烟到家使人迷知音者

誰子倦客無光輝
玉侯不可謁
秣馬興言歸
豈無他人遊
不如我項荒陳書
北窻下此自有餘師

次韻孔四著作北行滹沱

駝褐蒙風霜
雞聲渺墟里
青燈進豆粥
落月踏冰水平
生不龜藥才可衛
十指持比千戶封
誰能優劣此

渡河

客行歲晚非遠遊
河水無情日夜流
去年排堤注東郡
詔使奪河還此州
憶昔冬行河梁上
飛雪千里曾冰壯

人言河源凍徹天冰底猶聞沸驚浪

次韻寄李六弟濟南郡城橋亭之詩

客心如頭垢日欲撩千篋聞人說江南喜氣吐晴霓伏
枕夢歸路子規吟翠微濟南似江南舊見今不疑洗心
欲成游王事相奪移駑馬戀棧豆豈能辭繫縲本無封
侯骨見事又重遲徒能多嗜酒大腹如鴻夷唯思一漁
舟載網橫渺瀰橋首歷下亭朱欄轉清溪春風吹桃李
三月自成蹊翠葉張日幄紅英鋪地衣此中有嘉興不醉

定自非况當郡政成野蠶麥兩岐與民同觀游永夜不
闔扉女牆上金樞天如青琉璃想子果下歸馬飽生芻
嘶

和甫得竹數本於周翰喜而作詩和之

初侯一卧宮風雨到卧席前日築短垣昨日始封植平
生歲寒心樂見歲寒色翩翩佳公子為致一牕碧憶公
來相居筮吉龜墨食人言陋如何我自適其適白眼對
俗徒醉帽坐歌側人知愛酒爾不解心得得阿堵絕往

還此君是賓客清風吹月來驢甚齒折屐有節似見聖
無言諒知默數回長者車猶恨地未僻陰雨打葉時曲
肱自宴息心游萬物初何處尋轍迹從來脩竹林乃是
逸民國

寄題欽之草堂

河南有伏流經營太行根盛德不終晦發為清濟源公
家濟源上太行正當門脩竹帶藩籬百禽鳴朝暎仰視
浮雲作俯窺流水奔相望有盤谷李愿故居存主人國

之老實惟商巖孫班行昔供奉屢進逆耳言天子色為
動羣公聲亦吞蕭蕭冰霜際不改白玉溫出處士所重
其微難共論公勿懷草堂朝廷待公尊

和答梅子明王揚休點密雲龍

小壁雲龍不入香元豐龍焙承詔作二月嘗新官字盞
游絲不到延春閣去年曾闕減光輝人間十九人未知

外家春官小宗伯分送蓬山裁半壁建安甕碗鷓鴣斑
谷簾水與月共色五除試湯飲墨客泛甌銀粟無水脉

辟宮邂逅王廣文初觀團團破龍紋諸公自別淄澠了
兔月葵花不足論石碓春芽風雪落黃澆肺渴初不惡
河伯來觀東海若鹿逢朱雲真折角子真雲孫唾成珠
廟堂只今用諸儒鍊成五石補天手上書致身可亨衢
顧我賜茶無骨相他年幸公肯相餉

送劉道純

五松山下古銅官邑居褊小水府寬民安蒲魚少噐訟
簿領未減一丘槃習中崢嶸書萬卷簸弄日月江湖間

稠人廣衆自神王按劍之眼白相看老身風波諳世味
如食橘袖知甘酸麒麟圖畫偶然耳半枕百年夢邯鄲
平生樽俎宮亭上涉世忘味皆朱顏此時阿翁尚無恙
追琢秀句酬江山堂堂今為蛻蟬去五老偃蹇無往還
大梁城中笏拄頰頰髭今成雪點斑青雲何必出公右
亨衢在天無由攀椎鼓轉舩如病已夢想樓臺落星灣
子正諸兒喜文史阿秤亦聞有筆端丹徒布衣未可量
詩書且對藜藿盤穴中生涯識陰雨木末牖戶知風寒

金匱要略卷之三
卷二
我今四壁戀微祿知公未能長挂冠

次韻子瞻春菜

北方春蔬嚼冰雪妍暖思采南山蕨
韭苗水餅姑置之
苦菜黃鷄羹糝滑蓴絲色紫莨首白
萸蒿牙甜焯頭辣
生菹入湯翻手成芼以薑橙誇縷抹
驚雷菌子出萬釘
白鵝截掌鱉解甲琅玕林深未飄籜
軟炊香杭煨短茁
萬錢自是宰相事一飯且從吾黨說
公如端為苦笋歸
明日青衫誠可脫

六舅以詩來覓銅犀用長句持送舅氏學古之餘
復味禪悅故篇末及之

海牛壓紙寫銀鈎阿雅

師奴僧號

守之索自收長防玩物敗

兒性得歸老成散百憂先生古心冶金鐵堂堂一角誰
能折見言觥觥持贈誰外家子雲乃翁師不著鼻繩袖
兩手古犀牛兒好者取

次韻子瞻與舒堯文禱雪霧豬泉唱和

老農年饑望人腹想見四溟森雨足林回投壁負嬰兒

豈聞烹兒翁不哭未論萬戶無炊烟蛛絲蝸涎經杼軸
使君閔雪無肉味煮餅青蒿下鹽菽豈云剪爪宜侵肌
霜不殺草仍故綠幽靈燹鼎西山霧牲肥酒香神未瀆
得微徃從董父餐寧當罪繫葛陂淵卜擇祠官齊博士
暴露致告蒼崖顛請天行澤不汲汲爾亦枯魚過河泣
生鵝斬頸血未乾風馬雲車坐相及百里旌旗灑玉花
使君義動龍蛇螫老農歡喜有春事呼兒飯牛理菜笠
博士勿歎從公疲明年麥飯滑流匙

見子瞻粲字韻詩和答三人四返不困而愈崛竒
輒次舊韻寄彭門三首

公材如洪河灌注天下半風日未嘗櫻晝夜聖所歎名
世三十年窮無歌舞玩入宮又見妒徒友飛鳥散一飽
事難諧五車書作伴風雨暗樓臺鷄鳴自昏旦雖非錦
繡贈欲報青玉案文似離騷經詩窺闕睢亂賤生恨學
晚曾未奉中盥昨蒙雙鯉魚遠託鄭人緩風義薄秋天
神明還舊貫更磨薦襴墨推挽起疲懦忽忽未嗣音微

陽歸侯炭仁風從東來拭目望齋館鳥聲日日春柳色
弄晴暖漫有酒盈樽何因見此粲

人生等尺捶豈耐日取半誰能如秋蟲長夜向壁歎朝
四與暮三適為狙公玩臭腐豈神奇喑噫即飄散我觀
萬世中獨立無介伴小黠而大癡夜氣不及旦低首甘
豢養尻雕登俎案所以終日飲醉眠朱碧亂無人明此
心忍垢待濯盥仰者東飛雲只使衣帶緩先生古人學
百氏一以貫見義勇必為少作哀俗懦忠言願回天不

忍數吞炭還從股肱郡待詔圖書館投壺得賜金侏儒
餘飽暖寧令東方公但索長安粲

元龍湖海士毀譽略相半下床卧許君上床自永歎丈
夫屬有念人物非所玩坐令結歡客化為烟霧散武功
有大略亦復寡朋伴詠歌思見之長夜鳴鶡旦東南望
彭門官道平如案簡書束縛人一水不能亂斯文媿拒
皂可用圭瓚盥誠求活國醫何忍弃和緩開疆日百里
都內錢朽貫銘功甚俊偉迺見儒生懦且當置是事勿

使冰作炭上帝羣玉府道家蓬萊館曲肱夏簟寒炙背
冬屋暖只令文字垂萬世星斗粲

次韻答堯民

君開蘇公詩疾讀思過半譬如聞韶耳三月忘味歎我
詩豈其朋組麗等俳玩不聞南風絃同調廣陵散鶴鳴
九天上肯作家雞伴晁子但愛我品藻私月旦官閒樂
相從梨栗供杯案門靜鳥雀嬉花深蜂蝶亂忽蒙加禮
貌齋戒事搢盥門大心更小意督辭反緩君材於用多

舞選弓矢貫聰明回自照勝己果非懦我如相繪事素
質施朽炭古來得道人非獨大庭館晁子已不疑冬寒
春自暖繫表知藥言擇友得苟粲

再和寄子瞻聞得湖州

天下無相知得一已當半桃僵李為仆芝蕙增歎佳
人在江湖照影自娛玩一朝入漢宮掃除備冗散何如
終流落長作朝雲伴相思欲面論坐起難五旦身慚尸
廩祿有罪未見案公又雄萬夫皦皦不自亂臧穀皆亡

羊要以道湔盥傳聲向東南王事不可緩春波下數州
快若七札貫椎鼓張風帆相見激哀懦空文不傳心千
古付煨炭安得垂天雲飛就吳興館魚鱗柳絮肥笋蕈
溪沙暖解歌使君詞樽前有三粲

用明發不寐有懷二人為韻寄李秉彝德叟

竹貫四時清

一作竹節
晚逾綠

月通雲氣明

一作月華
寒更明

外弟有

佳質

一作處

妙年推老成後凋對霜雪

一作到
冰霜

不昧處陰

晴盛德當如此

一作觀物
憶相見

古人畏後生

一作契闊
難為情

在昔授子書鬣彼垂兩髮乖離今十年樹立映先達清

燈哦妙

一作
誦佳

句如酌春酒滑把書念攜手惆悵至明發

人生不如意十事恒八九未見歷下人徒傾歷城酒從
來親骨肉不免相可不但願崇事實虛名等箕斗

蚤知鵲山亭李杜發佳思彌年聽傳誇登覽通夢寐遙
憐坐清曠落筆富新製尚因賓客集漉酒使我醉

往在舅氏旁獲拚堂上帚六經觀聖人明如夜占斗索
居廢舊聞獨學無新有羨子杞桂材未曾離矯揉

安詩無恙時學行超輩儕華屋落丘山百憂滿人懷此

士如不亡仲子

一作叔也

抱奇材不獨典型在神明還觀來

少時

一作年

誦詩書貫穿數萬字爾來窺陳編記一忘三

二光陰如可玩老境翻手至良醫曾折足說病乃真意
桃李春成徑本自不期人歷下兩寒士簞瓢能悅親耻
蒙伐國問肯卧覆車塵子既得此友從之求日新

賦未見君子憂心靡樂八韻寄李師載

同陞吏部曹往在紀丁未別離感寒暑歲星行十二我

慚雞蓋穀子歎天且剽空餘山梁期尚不昧初志
會合良難期繫匏各異縣千里共明月如披故人面浮
雲蔽高秋此豈中心願霧重豹成文水清魚自見
齊地穀翔貴排門無黷饋二仲有甘旨奉親亦良勤原
田水洗洗何時稼如雲無民願豐歲政自不忘君
古人有成言歲暮於君子斧揮郢人鼻琴即鍾期耳新
詩凌建安高論到正始徒言參隔辰未負石投水
白雪非衆聽夜光忌暗投古來不識察浪自生百憂三

月楚國淚千年郢中樓無因杭一葦濁水拍天流

河南李茂彥內蘊邁俗心濬冲有涇渭一顧重千金事
親知色難勝已又勇沉外物既難必求之首陽岑

飄風從東來雨足盡西靡萬物逐波流金石終自止涓
因涇使濁菲以葑故毀智所無奈何誰能為樗里

紛紛車馬客如集市人博彼雖有求來我但使一喙忽
逢媚學子時亦撼關鑰何當携手期濠上得魚樂

以同心之言其臭如蘭為韻寄李子先

往日三語掾解道將母同我觀李校書超邁有古風談
道屢入微閉門長蒿蓬誰能賞遠韻太守似安豐

流水鳴無意白雲出無心水得平淡處渺渺不厭深雲
行不能雨還歸碧山岑斯人似雲水廊廟等山林

俗士得失重舍龜觀朶頤六經成市道駟僧以為師吾
學淡如水載行欲安之惟有無心子白雲相與期
推藏褫冠冕寂寞歸丘園一瓢俱好學伯仲吹簫堦政
以此易彼高車宅朱門得失固有在難為俗人言

携手日不足七年坐乖離愁思不能眠起視夜何其殘
月掛破鏡寒星滿天垂明明故人心維年終不移

窮閭萬蔓富屋酒肉臭酒肉令人肥萬蔓令人瘦欲
從鍾鼎食復恐憂患構秦時十戶侯寂寞種瓜後

客從濟南來遺我故人書墨淡字疎行故人情有餘上
言猶健否次問意何如只今意何有思食故溪魚

意一作思

吾子有嘉德譬如含薰蘭清風不來過歲晚蒿艾間古
來百夫雄白首在澗槃非闕自取重直為知人難

次韻晁元忠西歸十首

我田失耕耘歲暮拾枯萁

一作採
蕨薇

枯萁

一作
蕨薇

不可食日

晏抱長飢猛虎依山林眼有百步威一從梁鴛食風月
何時歸

聖莫如東家長年困行路公養為淹留豈不以食故林
薄鳥遷巢水寒魚不聚孤士似無家轉蓬何由住

前有熊羆咆後有虎豹號已出澗谷底更陟山阪高五
日一併食十年一緼袍未知歸宿處豈憚鞍馬勞

麗姬封人子弄影愛朝日晉國始得之涕泣甘首疾憂
危與安樂一生誰能必同床食芻豢迺悔沾襟失

怨句識之推商歌知甯戚我占晁氏賢乃在賦行役同
游羿彀中儻免非爾力滔滔今如此去邦將安適

熱避惡木陰渴辭盜泉水曾回勝母車不落抱玉淚晁
氏猛虎行皦皦壯士意人生高唐觀有情何能已

晁詩
云安

得龍山潮駕回寶河水水
從樓前來中有美人淚

腰垂九片璜耳著明月璫蘭蓀結襟帶菱荷製衣裳其

人雖甚遠其室大道傍當身不著意千載永相望
風雨去家行手龜面黧黑屠龍非世資學問求自得我
思脊令詩同飛復同息兄弟無相遠急難要羽翼
人言貧在家殊勝當作客雞棲牛羊下君子亦安息千
里求明師營糧從事役學問非物外室虛生純白
開田望食麥春隴無秀色深耕不償勤牛耳徒濕濕豐
凶誰主張坐令愁煎迫河清會有時得酒灑胷臆

山谷外集卷二